

Najugaqatigiiffinni tamani pisortanit pigineqartuni ajornartorsiutip siusissukkut iliuseqarfigineqartarnissaa siunertaralugu inissiani attartortittakkani aaqqissuussamik ikinnerpaamik ukiumut ataasiarluni oqoqassutimik misissuisoqartalernerata aningaasatigut allaffissornikkullu kingunerisassaannik qulaajaaviusussamik Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi taamatuttaaq qitiusumik qarasaasiatigut paasissutissaasivimmik assigisaanilluunniit misissuinernik nalunaarsuiviusussamik pilersitsineq eqqarsaatigalugu tamatumani aningaasatigut kingunerisassai qulaajarneqassapput. Najugaqartunut oqummik sapigalinnut pisortallu inissiaataanni attartortittakkami oquttumi najugaqarsimanerup malitsigisaanik nappaateqalersimasunut immikkut ilisimasalinnit peqqissutsikkut ikiorsiinissamut tapersersuinissamullu neqerooruteqartoqartalERPAT tamatuma aningaasatigut kingunerisassai nassuiaammi qulaajarneqassapputtaaq.

(Inatsisartunut ilaasortaq, Anna Wangenheim)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Demokraatinit Inatsisartunut ilaasortap Anna Wangenheim-ip siunnersuuteqarneranut, Naalakkersuisut sinnerlugit qutsavigaara.

Siunnersuuteqartup siunnersuutimini oqaatigaa, pingaartumik aserfallatsaaliuinissami annertuumik kinguaattooruteqartoqartoq paasineqarmat, pisortat inissiaataanni attartortittakkani massakkut qassit oqoqarnersut pillugit tamakkiisumik takussutissaateqannginneq inuit peqqissusaannut imaannaanngitsumik kinguneqarsinnaasoq. Taassuma saniatigut siunnersuuteqartup erseqqarissaatigaa, oqoqarnera ineqartunut peqqissutsikkut ajortorujussuarmik kingunerlutsitsisinnaasoq.

Inissiat peqqissut inuit peqqissusaannut aalajangiisuummata, Naalakkersuisut siunnersuuteqartumut tamakkiisumik isumaqataapput. Inissiap peqqinnanngitsutut isigineqarneranut patsisaasut assigiinngitsorpasuusinnaapput. Taamaakkaluartoq inissiat peqqissuunnginnerinut patsisaasuni arlaliqisuni oquk ilaavoq.

Tamanna patsisigerpiarlugu Namminersorlutik Oqartussat inissiaataasa attartortittakkat nutarterneqarnissaat pillugu Naalakkersuisut suliniummik aallartitsipput. Tassunga

tunngatillugu inissiat annertuumik nutarterneqarnissaannut ukiumoortumik aningaasanut inatsisini Naalakkersuisut aningaasanik annertuunik immikkoortitsinikuupput, tamannalu pitsaanerusunik ineqalersitsivoq, minnerunngitsumillu Namminersorlutik Oqartussat inissiaataanni attartortunut pitsaanerusunik atugassaqalersitsilluni.

Suliniut pisariaqartuuartillugu, Namminersorlutik Oqartussallu najugaqarfiisa suliat taakkua namminneq akissaqalersinnissaasa tungaannut Naalakkersuisut suliniut ingerlatiinnarniarpaat.

Siunnersuuteqartup erseqqarissaatigisaatut, Namminersorlutik Oqartussat inissiaataat attartortittakkat oqoqarnersut aaqqissuussamik misissorneqarneq ajorput. Inissiat iserterfigineqarnerini, qimanneqarnerinilu inissiat ullumikkut misissorneqartarput, tassanilu aamma iluarsartuussinissamik, nutarterinissamillu pisariaqassuseq aamma naatsorsorneqartarluni. Tassani attartortuusimasup kiisalu attartortut nutaat nalunaarusiaat, inissiamik teknikkikkut misissuinerit, sulisartut sulisullu allat inissiamik misissuisimasut nalunaarusiaat aamma ilaatinneqartarput.

Taassuma saniatigut teknikkikkut misissuisut ajornartorsiutaasinnaasunik pasitsaassaqartillugit, inissiami misissugassanik tiguisoqartarpoq. Attartortut paasissutissiissutigisartagaat, inissiallu silaannaat pillugu ajornartorsiuteqarsimagunik tamanna pillugu nalunaarutigisartagaat pingaarnerpaapput.

Illuni isugutammik ajoquserneqarsimasuni sivisuumik najugaqarneq, peqqissutsikkullu ajornartorsiuteqarneq erseqqarissumik ataqatigiipput. Oquit assigiinngitsut, taakkualu inerittussai stofskiftiilu qanoq sunniuteqartarnersut tamakkiisumik ilisimaneqanngilaq. Peqqissutsikkut ajornartorsiutaasut assigiinngitsorpassuusinnaapput, ersiutillu assigiinngitsuusinnaallutik, soorluttaaq qanoq iliartornerat ajorsiatornerallu assigiinngissinnaasut. Taamaakkaluartoq ersiutit nappaatillu taakkua inissiap isugutanneranik, oqoqarneranillu immikkut patsiseqanngillat, tassungalu attuumassuteqartuaannanngillat.

Oqummik sapigaqalersimasut, oqullu patsisaalluni nappaateqalersimasut erseqqarissumik killilerneqarsinnaanngimmata nalilerneqarpoq, najugaqartunut taakkununga immikkut ilisimasalinnit peqqissutsikkut ikiorsiinissamik, tapersersuinissamillu neqerooruteqartoqartalerpat tamatuma aningaasatigut kingunerisinnaasai aamma missiliorneqarsinnaanngitsut. Taamaakkaluartoq nunami innuttaasut sumik patsiseqaraluarnersumik nappaateqartut pisariaqartumik katsorsartinnissaat Naalakkersuisunut pingaaruteqarpoq.

Siusissukkut iliuuseqarnissaq siunertaralugu Namminersorlutik Oqartussat inissiaataasa attartortittakkat oqoqarnerinik aaqqissuussamik misissuisoqartarnissaanik pisariaqartitsinermik qulaajaanissaq pillugu Naalakkersuisut isumaqarput, tamanna

aningsaasaqarnikkut, allaffissornikkullu qulaajagassaqqissoq. Taamaalilluni siunnersuut allanngorlugu Naalakkersuisunit suliaqarpugut.

Nassuiaat qaqugu Inatsisartunut agguanneqarnissaanut siunnersuummi kissaatigisamik piffissaliussaqaanngilaq, tamannalu pillugu nassuiaat qaqugu Inatsisartunut agguanneqarnissaanik piffissalerlugu Naalakkersuisut allannguutissatut siunnersuuteqarlutik.

Tamanna tunuliaqutaralugu Naalakkersuisut ima allannguutissatut siunnersuuteqarput:
” Najugaqatigiiffinni tamani pisortanit pigineqartuni ajornartorsiutip siusissukkut iliuseqarfigineqartarnissaa siunertaralugu inissiani attartortittakkani aaqqissuussamik ikinnerpaamik ukiumut ataasiarluni oqoqassutsimik misissuisoqartalernerata aningaasatigut allaffissornikkullu kingunerisassaannik qulaajaaviusussamik Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi taamatuttaaq qitiusumik qarasaasiatigut paasissutissaasivimmik assigisaanilluunniit misissuinernik nalunaarsuiviusussamik pilersitsineq eqqarsaatigalugu tamatumani aningaasatigut kingunerisassai qulaajarneqassapput. 2025-mi ukiakkut ataatsimiinnermi nassuiaat Inatsisartunut agguanneqassaaq.”